



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XIII. Gregorii Papae I. Ad Agnellvm Episcopvm De Fvndis. Praecipit
vt in Taracinensi ecclesia sit episcopus.

urn:nbn:de:hbz:466:1-15221

quatenus his in Romanam, sicut diximus, ciuitatem transfmissis, sub celeritate sciamus, quid auxiliante Domino, de persona salubrius eius disponere debeamus.

EPISTOLA XIII.

GREGORII PAPÆ I.

AD AGNELLVM EPISCOPVM DE FVNDIS.

Præcipit vt in Taracinensi ecclesia sit episcopus.

Gregorius Agnello episcopo de Fundis, qui nunc in ciuitate incardinatus est Taracina.

RELATIO cleri simul & populi Taracinæ degentis nos valde lætificat, ob hoc quod de tua fraternitate bona testatur. Et quia defuncto Petro pontifice suo, sibi cardinalem postulant constitui te sacerdotem, eorum vota necessario complenda esse præuidimus, quatenus & illi se gaudeant impetrasse quod postulant, & nos concessisse quod expedit videamur. Quia igitur ob cladem hostilitatis nec in ciuitate, nec in ecclesia tua est cuiquam habitandi licentia, ideo te auctoritate nostra Taracinensi ecclesiæ cardinalem constituimus sacerdotem, admonentes, vt ita de animabus populorum illic consistentium, Deo protegente, debeas esse sollicitus, quatenus callidi peruersique hostis insidiæ commisso tibi gregi qualibet arte nocere non valeant, sed sollicitudinis tuæ grex circumseptus custodia, digni se pastoris gaudeat meruisse tutamina. In tuis actibus plebi exempla bene viuendi existant. Auaritia in te vires non habeat. Tua prædicatione qui literas nesciunt quid diuinitus præcipiatur agnoscant. In Dei timore populum quemadmodum viuere possit tui mores instituant. Operibus exerce quod subiectos doces & prædicas. Actus tui in aliorum correptionem proficiant, in adiutorium sibi vitæ tuæ imitationem assumant. Sicque te in cunctis operibus exhibere festina, vt scripturam constructionemque in te habeat, quicumque aut negligit, aut non potest lectione formari. Tota igitur mentis intentione ita lucrum animarum Domino nostro facere festinato, vt digna te merces ante eius conspectum in die retributionis inueniat. Quidquid vero de prædictæ rebus ecclesiæ, vel eius patrimonio, seu cleri ordinatione promotio-

Ioan. diac.
libro 5. c. 15.
Grat. 21. qu.
1. cap. 5.
Polyc. libro
1. tit. 8.

Grat. 21.
qu. 1. cap. 6.

neve, & omnibus generaliter ad eam pertinentibus, solerter atque canonice ordinare facereque prouideris, liberam habebis, quippe vt sacerdos proprius, modis omnibus facultatem. Illud quoque fraternitatem tuam scire necesse est, quoniam sic te prædictæ Taracinensis ecclesiæ cardinalem esse constituimus sacerdotem, vt & Fundensis ecclesiæ pontifex esse non desinas, nec curam gubernationemque eius prætereas: quia ita fraternitatem tuam sapediæ Taracinensi ecclesiæ, sicut præfati sumus, præesse præcipimus, vt antediæ Fundensis ecclesiæ tibi iura potestatemve nullo modo subtrahamus.

EPISTOLA XIV.

GREGORII PAPÆ I.

AD TARACINENSES.

De Agnello episcopo suscipiendo.

Gregorius clero, ordini, & plebi consistenti in Taracina.

DILECTIONIS vestræ desideria insinuata nobis, quam abstulistis, petitio reserauit, electionemque vestram valde laudauimus, quia Agnellum fratrem & coepiscopum nostrum, probatum iam meritis, cardinalem vobis constitui deprecamini sacerdotem. Et quoniam gratæ laudandæque petitioni nec effectum negari, nec moram licebat innecti, secundum desideria petitionemque vestram supradictum Agnellum directa præceptione ecclesiæ vestræ cardinalem esse statuimus sacerdotem. Pro qua re dilectionem vestram paterna adhortatione commoneo, vt ei obedientiam præbere in omnibus debeatis, quatenus caritatis vestræ solatio roboratus, curam gubernationemque ecclesiæ, quam vobis probatur petentibus suscepisse, adiuuante Domino salubriter valeat implere.